

四庫全書

集部

欽定四庫全書

集部

古文集成卷五十五至五十七

詳校官中書臣沈鵬

助教臣常循覆勘

總校官檢討臣何思鈞

校對官助教臣卜惟吉

謄錄監生臣劉本立

欽定四庫全書

古文集成卷五十五

宋王霆震編

前卒集一

封事

元光封事

依正本漢書音

劉向

迂齋云

鋪叙有倫首尾相應又須要看向所處
是何地位味其書詞方知其忠愛懇惻

之意與他

人不同

臣前幸得以骨肉備九卿

迂齋云此向
所據地位

奉法不謹乃復

蒙恩切見災異並起天地失常徵表為國欲終不言念
忠臣雖在眵畝猶不忘君惓惓之義也況重以骨肉之
親又加以舊恩未報乎欲竭愚誠又恐越職然惟二恩
未報忠臣之義一抒愚意退就農畝死無所恨臣聞舜
命九官濟濟相讓和之至也

自舜至幽厲以後皆含
君子小人意在其中衆

賢和於朝則萬物和於野故蕭韶九成而鳳凰來儀擊
石拊石百獸率舞四海之內靡不和寧及至周文開基
西郊雜還衆賢罔不肅和崇推讓之風以銷紛爭之訟

文王既沒周公思慕歌詠文王之德其詩曰於穆清廟
肅雍顯相濟濟多士秉文之德當此之時武王周公繼
政朝臣和於內萬國驩於外故盡得其驩心以事其先
祖其詩曰有來雍雍至止肅肅相維辟公天子穆穆言
四方皆以和來也諸侯和於下天應報於上故周頌曰
降福穰穰又曰飴師古曰與貽同我釐與來同麴音牟釐麴麥也始
自天降此皆以和致和獲天助也下至幽厲之際朝廷
不和轉相非怨詩人疾而憂之曰民之無良相怨一方

欽定四庫全書

古文集成
卷五十五

二

衆小在位而從邪議歛歛相是而背君子故其詩曰歛
歛訛訛亦孔之哀謀之其臧則具是違謀之不臧則具
是依君子獨處守正不撓衆枉勉強以從王事則反見
憎毒讒愬故其詩曰密勿從事不敢告勞無罪無辜讒
口咎咎當是之時日月薄蝕而無光其詩曰朔月辛卯
日有蝕之亦孔之醜又曰彼月而微此日而微今此下
民亦孔之哀又曰日月鞠凶不用其行四國無政不用
其良天變見於上地變動於下水泉沸騰山谷易處其

詩曰百川沸騰山冢卒崩高岸為谷深谷為陵哀今之人胡惜莫懲霜降失節不以其時其詩曰正月繁霜我心憂傷民之訛言亦孔之將言民以是為非甚衆大也此皆不和賢不肖易位之所致也自此之後天下大亂篡殺殃禍並作厲王奔彘幽王見殺至乎平王末年魯隱之始即位也周大夫祭伯乖離不和出奔於魯而春秋為諱不言來奔傷其禍殃自此始也是後尹氏世卿而專恣諸侯背畔而不朝周室卑微二百四十二年之

間日食三十六地震五山陵崩阤二彗星三見夜常星
不見夜中星隕如雨一火災十四長狄入三國五石隕
隆六鵠退飛多麋有蜮蜚鸛鵒來巢者皆一見晝冥晦
雨木冰李梅冬實七月霜降草木不死八月殺菽大雨
雹雨雪霽霆失序相乘水旱饑螽螽螽螽午並起當是
時禍亂輒應弒君三十六亡國五十二諸侯奔走不得
保其社稷者不可勝數也周室多禍晉敗其師於貿莫侯
反戎伐其郊鄭傷桓王戎執其使衛侯朔召不往齊逆

命而助朔五大夫爭權三君更立莫能正理遂至陵夷

不能復興由此觀之和氣致祥乖氣致異祥多者其國

安異衆者其國危天地之常經古今之通義也今陛下

開三代之業招文學之士優游寬容使得並進今賢不

肖渾轂白黑不分邪正雜揉忠讒並進章交公車人滿

北軍朝臣舛午五故反膠戾乖刺來蜀反更相讒愬轉相是

非傳授增加文書紛糾前後錯謬毀譽渾亂所以營惑

耳目感移心意不可勝載分曹為黨往往羣朋將同心

欽定四庫全書

古文集成
卷五十五

四

以陷正臣正臣進者治之表也正臣陷者亂之機也乘

治亂之機未知孰任而災異數見此臣所以寒心者也

夫乘權藉勢之人子弟鱗集於朝羽翼陰附者衆輻湊

於前毀譽將必用以終乖離之咎是以日月無光雪霜

夏隕海水沸出陵谷易處列星失行皆怨氣之所致也

夫遵衰周之軌迹應前循詩人之所刺總括得盡而欲以成太

平致雅頌猶卻行而求及前人也初元以來六年矣案

春秋六年之中災異未有稠如今者也夫有春秋之異

無孔子之救猶不能解紛况甚於春秋乎原其所以然

者讒邪並進也讒邪之所以並進者由上多疑心既已

用賢人而行善政如或譖之則賢人退而善政還夫執

狐疑之心者來讒賊之口持不斷之意者開羣枉之門

讒邪進則衆賢退言不兩立羣枉盛則正士消故易有否泰

小人道長君子道消君子道消則政日亂故為否否者

閉而亂也君子道長小人道消小人道消則政日治故

為泰泰者通而治也詩又云雨雪廕廕見晁聿消與易

欽定四庫全書

古文集成
卷五十五

五

同義昔者鯀共工驩兜與舜禹雜處堯朝看他發明周公與

管蔡並居周位當是時迭進相毀流言相謗豈可勝道

哉帝堯成王能賢舜禹周公而消共工管蔡故以大治

榮華至今孔子與季孟偕仕於魯季斯與叔孫俱宦於

秦定公始皇賢季孟季斯而消孔子叔孫故以大亂汚

辱至今治亂只在反覆之間故治亂榮辱之端在所信任信任既

賢在於堅固而不移詩云我心匪石不可轉也言守善

篤也易曰渙汗其大號言號令如汗汗出而不反者也

今出善令未能踰時而反是反汗也用賢未能三旬而退是轉石也論語曰見不善如探湯今二府奏佞調不當在位歷年而不去故出令則如反汗用賢則如轉石去佞則如拔山如此望陰陽之調不亦難乎是以羣小窺見間隙緣飾文字巧言醜詆流言飛文譁於民間故詩云憂心悄悄愠於羣小小人成羣誠足愠也昔孔子與顏淵子貢更相稱譽不為朋黨禹稷與臯陶轉相汲引不為比周何則忠於為國無邪心也故賢人在上位

則引其類而聚之於朝易曰飛龍在天大人造也在下
位則思與其類俱進易曰拔茅茹以其彙征吉在上則
引其類在下則推其類故湯用伊尹不仁者遠而衆賢
至類相致也今佞邪與賢臣並交戟於內合黨共謀違
善依惡歛歛訛訛數設危險之言欲以傾移主上如忽
然用之此天地之所以先戒災異之所以重至者也自
古明聖未有無誅而治者也故舜有四放之罰而孔子
有兩觀之誅然後聖化可得而行也今以陛下明知誠

深思天地之心近察兩觀之誅覽否泰之卦觀雨雪之

詩

括盡前面
許多話頭

歷周唐之所進以為法原秦魯之所消以

為戒更考祥應之福省災異之禍以揆當世之變放遠
佞邪之黨壞散險詖之聚杜閉羣枉之門廣開衆正之
路決斷狐疑分別猶豫使是非炳然可知則百異消滅
而衆祥並至太平之基萬世之利也臣幸得託肺腑誠
見陰陽不調不敢不通所聞切推春秋災異以救今事
一二條其所以不宜宣泄

紹興戊午論和議封事

是年十一月上

澹庵胡

忠簡公

常州吳憲仲師古跋敵人復議論講和蓋見比
來國勢稍振將復父兄之讎故欲以此緩我邊
備朝廷大臣務偷一時之安昧久遠之計遂悉
從其議天下之人見夫行墮敵人之計抑鬱之
氣無不填塞胷臆如癰疽之不得潰言路之臣
又皆保寵固位無有念朝廷而進砭劑者編修
官胡某乃能不畏鼎鑊越職犯分進切直之言
少回天聽真國醫也師古切歎侍郎鄒公之後
寂寞無聞今復喜見胡公恐其文隆地且欲使
荒微知中國之有人不敢復肆姦詐因鏤勝板
以廣其傳然參政李公雅所傾望今已進用矣
其施為注措必大有可觀者則胡公之志奚患
其不伸耶因此除名編置筠州○周益公跋封
事藁紹興戊午胡公忠簡年三十有七以樞密

院編修官上書論和議此其藁也時長子方生
未幾南遷公知後禍巨測惟從姪昌齡字長彥
賢而可託故以藁屬之今五十餘年矣昔顏魯
公與魚朝恩論坐位帖藁摹本已數百載人爭
傳寶公之所論豈止坐位而其心畫端勁實法
魯公自當並傳於百世慶元丙辰六月庚戌平
園老吏周必大書○楊誠齋跋封事藁澹庵先
生忠簡胡公請尚方劍以却帝秦之書當其一
封朝奏之日敵人聞之募以千金三日得之君
臣動色發國有人焉之歎自是不敢南顧者二
十四年某昔誦其文今見其藁財尺紙耳一尺
之紙乃能却百萬之師一何壯哉其傳本尚以
千金況其藁乎昔仲尼孝經屬之曾子楊雄太
玄屬之侯芭非其人豈輕畀哉先生當竄謫嶺
海之時以子在襁褓此藁不屬之他人而屬之
猶子昌齡其人何如也昌齡幸能保而永之其

賢矣今先生之子澥又能刻石以示後學其亦
賢矣若胡氏世有人矣夫嘉泰癸亥仲冬丙寅
門人楊萬里敬書○薛秘書跋封事士憤激忠
義在下位至乞用斧鉞以誅權佞世不數見惟
漢朱雲以前槐里令請斷特進張禹頭唐柳玭
以太常博士請梟大將軍程元振顧紹興胡氏
以編修官請竿竿臣秦檜等首於藁街烈氣相
望雲不過數語仇所欲誅不過大閹惟胡公之
所論不獨關宗社之存亡乃天理之存亡不獨
係一時之榮辱乃萬世之榮辱自檜決和議迄
今甘為陵夷國恥未雪大雠未復三綱為之不
振當時三數人者雖閹門寸斬未足快天下忠
義之肝胡公之舉豈為過乎仇疏勁果與公辭
氣相似然元振汚刀鋸禹亦不足辱尚方劍也
公所欲誅閹係甚大古今罕儷公之子澥守沈
犁紱為供源長閒以公手書遺藁石刻見遺紱

齊戒即誦想公張膽奮筆時心搖神掣當解觸邪之角以為函析擊此之牙以為籤而襲以殿帷之囊載以都亭之輪發軌九折忠孝之途以達諸天下舒公未盡之緼毋敢數開禧元祺臘立春日漢嘉薛紱敬書○迂齋批論正詞嚴誼形於色晦翁謂可與日月爭光信哉

左通直郎樞密院編修官臣胡銓齋沐裁書昧死百拜獻於皇帝陛下臣謹按王倫本一奸邪小人市井無賴頃緣宰相無識遂舉以使敵專務詐誕欺罔天聽驟得美官天下之人切齒唾罵今者無故誘致敵使以詔諭江南為名是欲臣妾我也也是欲劉豫我也劉豫臣事金

人南面稱王自以為子孫帝王萬世不拔之業一旦金人改慮猝而縛之父子為虜商鑒不遠而倫又欲陛下效之夫天下者祖宗之天下也陛下所居之位祖宗之位也奈何以祖宗之天下為金人之天下以祖宗之位為金人藩臣之位陛下一屈膝則祖宗廟社之靈盡污草莽祖宗數百年之赤子盡屬瘡痍朝廷宰執盡為陪臣天下士大夫皆當裂冠毀冕變為異服異時逞其無厭之求安知不加以無禮如劉豫也哉夫三尺童子

至無知也指仇讎而使之拜則怫然怒今金人則仇讎也堂堂天朝相率而拜仇讎曾童孺之所羞而陛下忍為之耶倫之議乃曰我一屈膝則梓宮可還太后可復淵聖可歸中原可得嗚呼自變故以來主和議者誰不以此說啗陛下哉而卒無一驗是金之情偽已可知矣陛下尚不覺悟竭民膏血而不恤忘國大讎而不報含垢忍恥舉天下而臣之甘心焉就令金決可和盡如倫議天下後世謂陛下何如主況金人變詐百出而倫又

以奸邪濟之梓宮決不可還太后決不可復淵聖決不可歸中原決不可得而此膝一屈不可復伸國勢陵夷不可復振可為痛哭流涕長太息者矣向者陛下間關海道危如累卵當時尚不肯北面臣金況今國勢稍張諸將盡銳士卒思奮只如頃者金人陸梁偽豫入寇固嘗敗之於襄陽敗之於淮上敗之於渦口敗之於淮陰較之前日蹈海之危已萬萬矣儻不得已而遂至於用兵則我豈遽出敵人之下哉今無故而反臣之欲屈萬

乘之尊下穹廬之拜三軍之士不戰而氣已索此魯仲連所以義不帝秦非惜夫帝秦之虛名惜夫天下大勢有所不可也今內而百官外而軍民萬口一談皆欲食倫之肉謗議洶洶陛下不聞正恐一旦變作禍且不測臣竊謂不斬王倫國之存亡未可知也雖然倫不足道也秦檜以腹心大臣而亦為之陛下有堯舜之資檜不能致陛下如唐虞而欲導陛下如石晉近者禮部侍郎曾開等引古誼以折之檜乃厲聲折曰侍郎知故事我

獨不知則檜之遂非很愎已自可見而乃建白令臺諫從臣僉議可否是乃畏天下議已而令臺諫從臣共分謗耳有識之士皆以為朝廷無人吁可惜哉孔子曰微管仲吾其被髮左衽矣夫管仲霸者之佐耳尚能變左衽之區為衣冠之會秦檜大國之相也反驅衣冠之俗歸左衽之鄉則檜也不惟陛下之罪人實管仲之罪人矣孫近附會檜議遂得參知政事天下望治有如饑渴而近伴食中書漫不可否事檜曰敵可講和近亦曰可

和檜曰天子當拜近亦曰當拜臣嘗至政事堂三發問而近不答但曰已令臺諫侍從議矣嗚呼參贊大政徒取充位如此有如敵騎長驅尚能折衝禦侮耶臣竊謂秦檜孫近亦可斬也臣備員樞屬義不與檜等共戴天區區之心願斷三人頭竿之藁街然後羈留敵使責以無禮徐興問罪之師則三軍之士不戰而氣自倍不然臣有赴東海而死耳寧能處小朝廷求活耶

辛亥有旨某書凶悖

削籍流昭州○言行錄云公上書力排羣議出為福州僉判責新州又改吉陽軍斥居海外二十年

廬溪王庭珪與胡邦衡手簡某自去年聞邦衡以言事貶昭州中外聳瞻嘗約刻校書作送行詩以俟邦衡之南走欲效昔人送唐介為一時盛事既而恨邦衡謫太輕此作遂廢往時陳瑩中鄒志元名震天下號為敢言然當時利害尚未及今日事體之重也國危矣諫官御史不敢言而邦衡以一編修官摩天子之逆鱗折宰相而不悔決非所謂偶然者宜天下士大夫無賢不肖皆知稱頌邦衡也斯道未喪公議一出天子喟然思見其人邦衡雖欲散髮岩岫效僕之閑致不可得矣○王廬溪送公之新州詩二首坐貶辰州囊封初上九重關是日清都虎豹閑百辟動容觀奏牘幾人回首愧朝班名高北斗星辰上身墮南州瘴海間豈待他年公議出漢廷行召賈生還大厦元非一木支欲將獨力拄傾危癡兒不了官中事男子要為天下奇當

日姦諛皆膽落平生忠義只心知
端能飽喫新州飯在處江山足護持

古文集成卷五十五

欽定四庫全書

古文集成卷五十六

宋 王震震 編

前辛集二

封事

壬午應詔封事

朱文公

八月七日左迪功郎監潭州南岳廟臣朱熹謹昧死再拜上書於皇帝闕下臣恭惟太上皇帝再造區宇受命中興憂勤恭儉三十六年春秋未高方內無事乃深惟天

下國家之至計一旦而舉四海之廣天位之尊斷自宸衷傳之聖子皇帝陛下恭承慈訓應期御歷爰初踐祚曾未幾何而設施注措之間所以大慰斯民之望者新而又新曾靡虛日其規模固已宏遠矣然猶且謙冲退託不以聖智自居首下明詔以求直言此尤足以見帝王之高致知為治之先務也天下幸甚臣切伏草茅深自惟念天下之大不為無人忠言嘉謨崇論宏議計已日陳於陛下之前尚恐不足仰望清光無以少備採擇

況臣之愚雖欲效其區區豈能有補於萬分之一哉又
惟即位求言累聖相承以為故事則未知今日陛下之
意姑以備故事而已耶抑真欲博盡羣言以冀萬一之
助也臣誠愚昧不知所出愛君尊主出於犬馬之誠有
不能自己者故昧死言之惟陛下留聽臣伏讀詔書有
曰朕躬有過失朝廷有闕遺斯民有戚休四海有利病
並許中外士庶直言極諫者臣切以陛下潛德宮府幾
三十年不邇聲色不殖貨利無一物之嗜好形於宴私

無一事之過失聞於中外昧爽而朝嚴恭寅畏仁孝之德孚於上下所以大繫羣生之仰望濬發太上之深慈以至於膺受付託奄有萬方者其必有以致之矣然則聖躬之過失臣未之聞也今者臨御未幾而延登故老召用直臣抑僥倖以正朝綱雪冤憤以作士氣貢奉之私不輸於內帑恭儉之德日聞於四方凡天下之人所欲而未行所患而未去者以次罷行幾無遺恨然則朝政之闕遺臣亦未之聞也至於斯民之戚休四海之利

病則有之矣然臣屏伏閭閻十有餘年足跡未嘗及乎
四方其見聞所及之一二內自隱度皆非今日所宜道
於陛下之前者不敢毛舉以溷聖聽至若陰拱噤默終
不為陛下一言則又非臣之所敢安也臣聞召公之戒
成王曰若生子罔不在厥初生自貽哲命孟子之言亦
曰雖有智慧不如乘勢方今天命之眷顧方新人心之
漸向方切此亦陛下端本正始自貽哲命之時因時順
理乘勢有為之會也又況陛下聖德隆盛天下之人傳

誦道說有年於茲今者正位宸極萬物咸覩其心蓋皆以非常之事非常之功望於陛下不但為守文之良主而已也然而祖宗之境土未復宗廟之讎恥未除戎虜之奸譎不常生民之困悴已極方此之時陛下所以汲汲有為以副生靈之望者當如何哉然則今日之事非獨陛下不可失之時抑國家盛衰治亂之機廟社安危榮辱之兆亦皆決乎此矣蓋陛下者我宋之盛主而今日者陛下之盛時於此而不副其望焉則祖宗之遺黎

裔胄不復有所歸心矣可不懼哉可不懼哉臣愚死罪竊以為聖躬雖未有過失而帝王之學不可以不熟講也朝政雖未有闕遺而修攘之計不可以不早定也利害休戚雖不可徧以疏舉然本原之地不可以不加意也蓋學不講則過失萌矣計不定則闕遺大矣本不端則末流之弊不可勝言矣臣請得為陛下詳言之臣聞之堯舜禹之相授也其言曰人心惟危道心惟微惟精惟一允執厥中夫堯舜禹皆大聖人也生而知之宜無

事於學矣而猶曰精猶曰一猶曰執者明雖生而知之
亦資學以成之也陛下聖德純茂同符古聖生而知之
臣所不得而窺也然竊聞之道路陛下毓德之初親御
簡策衡石之程不過諷誦文辭吟詠性情而已比年以
來聖心獨詣欲求大道之要又頗留意於老子釋氏之
書踈遠傳聞未知信否然私獨以為若果如此則非所
以奉承天錫神聖之資而躋之堯舜之盛者也蓋記誦
華藻非所以探淵源而出治道虛無寂滅非所以貫本

末而立大中是以古者聖帝明王之學必將格物致知以極夫事物之變使事物之過乎前者義理所存纖微畢照瞭然乎心目之間不容毫髮之隱則自然意誠心正而所以應天下之務者若數一二辨黑白矣苟惟不學與學焉而不主乎此則內外本末顛倒繆戾雖有聰明睿智之資孝友恭儉之德而智不足以明善識不足以窮理終亦無補乎天下之治亂矣然則人君之學與不學所學之正與不正在乎方寸之間而天下國家之

治不治見乎彼者如此其大所繫豈淺淺哉易所謂差之毫釐繆以千里此類之謂也蓋致知格物者克舜所謂精一也正心誠意者克舜所謂執中也自古聖人口授心傳而見於行事者惟此而已至於孔子集厥大成然進而不得其位以施之天下故退而筆之以為六經以示後世之為天下國家者於其間語其本末終始先後之序尤詳且明者則今見於戴氏之記所謂大學篇者是也故承議郎程顥與其弟崇政殿說書頤近世大

儒實得孔孟以來不傳之學皆以為此篇乃孔孟遺書
學者所當先務誠至論也臣愚伏願陛下捐去舊習無
用浮華之文攘斥似是而非邪說之說少留聖意於此
遺經延訪真儒深明厥旨者置諸左右以備顧問研究
充廣務於至精至一之地而知天下國家之所以治者
不出乎此然後知體用之一源顯微之無間而獨得乎
堯舜禹湯文武周公孔子之所傳矣於是考之以六經
之文監以歷代之跡會之於心以應當世無窮之變以

陛下之明聖而所以浚其源輔其志者如此其備則其所至豈臣愚昧所能量哉然臣非知道者凡此所陳特其所聞於師友之梗槩端緒而已陛下由是講學而自得之則必有非臣之言所能及者惟陛下深留聖意毋忽則天下幸甚臣又聞之為天下國家者必有一定不易之計而今日之計不過乎修政事攘敵國而已矣非隱與而難知也然其計所以不能定者以講和之說疑之也夫金人於我有不共戴天之讎則其不可和也義

理明矣而或者猶為是說者其意必曰今本根未固形勢未成進未有可以恢復中原之策退未有可以備禦衝突之方不若縻以虛禮因其來聘遣使報之請復土疆示之以弱使優游驕怠未遽謀我而我得以其間從容興補而大為之備萬一天意悔禍或誘其衷則我之所大欲者將不用一士之命而可以坐得何憚而不為哉臣切以為知義理之不可為矣而猶為之者必以有利而無害故也而以臣策之所謂講和者有百害而無

一利何苦而必為之夫復讎討賊自彊為善之說見於經者不啻詳矣陛下聰明稽古固不待臣一二言之請始陳其利害而陛下擇焉夫議者所謂本根未固形勢未成進不能攻退不能守何為而然哉正以有講和之說故也此說不罷則天下之事無一可成之理何哉進無死生一決之計而退有遷延可已之資則人之情雖欲勉強自力於進為而其氣固已渙然離沮而莫之應矣其守之也必不堅其發之也必不勇此非其志之本

然氣為勢所分志為氣所奪故也故今日講和之說不
罷則陛下之勵志必淺大臣之任責必輕將士之赴功
必緩官人百吏之奉承必不能悉其心力以聽其上之
所欲為然則本根終欲何時而固形勢終欲何時而成
恢復又何時而可圖守備又何時而可恃哉其不可與
明矣若曰以虛禮縻之則彼雖仁義不足而凶狡有餘
誠有謀我之心則豈為區區之虛禮而驕誠有兼我之
勢則亦豈為區區之虛禮而輟哉若曰示之以弱則是

披腹心露情實而示之以本然之弱非強而示之弱之謂也適所以使之窺見我底蘊知我之無謀而益無忌憚耳縱其不來我恃此以自安勢分氣奪日復一日如前所云者雖復曠日十年亦將何計之可成哉則是所以驕敵者乃所以啓敵而自驕所以緩寇者乃所以養寇而自緩為人計則善矣而非吾臣子所宜言也且彼盜有中原歲取金幣據全盛之勢以制和與不和之權少懦則以和要我而我不敢動力足則大舉深入而我

不及支蓋彼以從容制和而其操術常行乎和之外是
以利伸否蟠而進退皆得而我方且仰首於人以聽和
與不和之命謀國者惟恐失金人之驩而不為久遠之
計進則失中原事機之會退則沮忠臣義士之心蓋我
以汲汲欲和而志慮常陷乎和之中是以跋前疐後而
進退皆失自宣和靖康以來首尾三四十年金人專持
此計中吾腹心決策制勝縱橫前却無不如意者而我
墮其術中曾不省悟危國亡師如出一轍去歲之事人

謂朝廷其知之矣而解嚴未幾敵使復至彼何憚於我而遽為若是是又欲以前策得志於我而我猶不悟也受而報之信節未還而海州之圍已急矣此其包藏反覆豈易可測而議者猶欲以已試敗事之餘謀當之其亦不思之甚也哉至於請復土疆而冀其萬一之得此又不思之大者夫土疆我之舊也雖不幸淪沒而豈可使彼仇讎之敵得以制其予奪之權哉顧吾之德之力如何耳我有以取之則彼將不能有而自歸於我我無

以取之則彼安肯舉吾力之所不能取者而與我哉且
彼能有之而我不能取則我弱彼強不較明矣縱其與
我我亦豈能據而有之彼有大恩我有大費而所得者
未必堅也向者燕雲三京之事可以監矣是豈可不為
之寒心也哉假使萬有一而出於必不然之計彼誠不
我欺而不責其報我必能自保而永無他虞則固善矣
然以堂堂大宋不能自力以復宗祖之土宇顧乃乞丐
於仇讎之金人以為國家臣雖不肖切為陛下羞之夫

前日之遣使報聘以是為請既失之矣及陛下嗣位天下之望曰庶幾乎而赦書下者方且禁切諸將毋得進兵申遣使介告諭纂承之意繼修和好之禮亦若有意於和議之必成而坐待土疆之自復者遠近傳聞頓失所望臣愚不能識其何說而切歎左右者用計之不詳也古語有之疑事無功疑行無名今敵以好來而兵不戢我所以應之者常不免出於兩塗而無一定之計豈非所謂疑事也哉以此號令使觀聽熒惑離心解體是

乃未攻而已却未戰而已敗也欲以此成恢復之功亦已難矣然失之未遠易以改圖往者不可諫而來者猶可追願陛下疇咨大臣總攬羣策鑒失之由求應之之術斷以義理之公參以利害之實罷黜和議追還使人苟未渡淮猶將可及自是以往閉關絕約任賢使能立紀綱厲風俗使吾修政事攘敵國之外孑然無一毫之可恃以為遷延中已之資而不敢懷頃刻自安之意然後將相軍民遠近中外無不曉然知陛下之志必於

復讎啓土而無玩歲愒日之心更相激厲以圖事功數
年之外志定氣飽國富兵強於是視吾力之強弱觀彼
釁之淺深徐起而圖之中原故地不為吾有而將焉往
此不過少遲數年之久而理得勢全名正實利其與講
和請地苟且僥倖必不可成之虛計不可同年而語也
惟陛下深留聖意毋忽則天下幸甚至於四海之利病
臣則以為繫於斯民之戚休斯民之戚休臣則以為繫
乎守令之賢否然而監司之本也欲斯民之皆得其所

本原之地亦在乎朝廷而已陛下以為今日之監司奸
賊狼藉肆虐以病民者誰非宰執臺諫之親舊賓客乎
其既失勢者陛下既按見其交私之狀而斥去之矣尚
在勢者豈無其人顧陛下無自而知之耳然則某事之
利為民之休某事之病為民之戚陛下雖欲聞之亦誰
與奉承而致諸民哉臣以為惟以正朝廷為先務則其
患可不日而自革而陛下似亦有意乎此矣蓋目前所
號召數君子者皆天下所謂忠臣賢士也所正朝廷之

其豈有大於此者哉然其才之所長者不同則任之宜者亦異願陛下於其大者使之贊元經體以亮天工於其細者使其居官任職以熙庶績能外事者使任典戎幹方之責明治體者使備拾遺補過之官又使各舉所知布之列位以共圖天下之事使疎而賢者雖遠不遺親而否者雖邇必棄毋主先入以致偏聽獨任之機毋篤私恩以犯示人不廣之戒進退取舍惟公論之所在是稽則朝廷正而內外遠近莫敢不一於正矣監司得

其人而後列郡之得失可得而知郡守得其人而後屬
縣之治否可得而察重其任以責其成舉其善而懲其
惡夫如是則事之所謂利民之所謂休將無所不舉事
之所謂病民之所謂戚將無所不除又何足以勞聖慮
哉苟惟不然而切切然今日降一詔明日行一事欲以
惠民而適增其擾者有之欲以興利而益重其害者有
之紛紜叢脞既非君道所宜宣布奉行徒為觀聽之美
而已則亦何補之有況今旱蝗四起民食將乏圖所以

寬賦役備賑贍業流通盜賊之計尤在於守令之得其人而其本原之地則又有在願陛下深留聖意毋忽則天下幸甚蓋天下之事至於今日無一不弊而不可以勝陳以獻言者之衆則或已能畧盡之矣然求其所謂要道先務而不可緩者此三事是也夫講學所以明理而導之於前定計所以養氣而督之於後任賢所以修政而經緯乎其中天下之事無出乎此者矣伏惟陛下因此初政端本正始自貽哲命之時因時順理乘勢

有為之會於此三言深加察納果斷力行以幸天下則夫所謂不可勝陳之事凡見於議者之言而合乎義理之公切於利害之計者自然循次及之各得其所若其不然今雖有求治之心而致之不得其方雖有致治之方而為之不得其序一旦恭勞儉苦憂勤過甚有所不堪而不見其效則亦終於因循怠惰而無所成矣豈天下之人所以延頸舉踵而望陛下之初心哉至於時雖欲悔之臣恐其倍勞聖慮而成效不可期也又况旱

蝗之灾環數千里陛下始初清明行誼未過而天戒赫然若是其甚其必有說矣臣愚切以為此乃天心仁愛陛下之厚不待改過行失其先致其警戒之意以啓聖心使盛德大美始終純全無可非問如商中宗周宣王因異而修德以致中興也是宜於此三術屢省而亟圖之以順民心以答天意以陛下之聖明必將有以處此愚臣所慮獨患議者不深維其所以然之故以為其間不免有所更張或非太上皇帝之意者陛下所不宜為以咈

親志臣切以為誤矣恭惟太上皇帝至公無心合德天地臨御三紀艱難百為其用人造事皆因時循理以應事變未嘗膠於一定之說先後始末之不同如春秋冬夏之變相反以成歲功存神過化而無有毫髮私意凝滯於其間其所以能超然遠引蹉脫萬乘而不以為難者由是而已本其傳位陛下之志豈不以陛下必能緝熙帝學以繼跡堯禹乎豈不以陛下必能任賢修政以惠康小民乎誠如是也則臣之所陳乃所以大奉太上

詒謀燕翼之聖心而助成陛下尊親承志之聖孝也議者顧欲守一時偶然之跡一二以循之以是為太上皇帝之本心則是以事物有形之粗而語天地變化之神也豈不誤哉且古者禪授之懿莫如堯舜之盛而舜承堯禪二十有八年之間其於禮樂刑政更張多矣其大者舉十六相皆堯之所未舉去四凶皆堯之所未去然而舜不以為嫌堯不以為罪天下之人不以為非載在虞書孔子錄之以為大典垂萬世法而況臣之所陳非

欲盡取太上皇帝約束紛更之也非貴其所賤賤其所
貴而悉更置之也因革損益顧義理如何耳亦何不可
而陛下何以之有哉願早圖之以幸天下毋疑於臣之
計也若夫戰守之機形制之勢則臣未之學不敢妄有
所陳然切念上流督帥物望素輕黜陟宜效於已試下
流戍兵直棄淮甸長江之險與虜共之斯乃古今之所
共憂愚智之所同惑臣雖鄙闇亦切疑之況今秋氣已
高敵情叵測傳聞洶洶咸謂當復有去歲之舉雖虛實

未可知然是二者實強弱安危形勢所係呼吸俯仰之間未足以喻其急也願陛下并留聖意臣不勝大願臣凡愚不學頃歲冒昧羣試有司太上皇帝賜之末第獲叨官祿既又誤聽人言猥加收召適以疾病留落不前今則血氣益衰精神益耗屏居山田未知所以仰報大恩之日敢因明詔罄竭愚衷昧死獻書以聞

古文集成卷五十六

欽定四庫全書

古文集成卷五十七

宋 王霆震 編

前辛集三

封事

庚子應詔封事

朱文公

四月二十一日宣教郎權發遣南康軍事兼管內勸農
事提轄本軍界分諸鋪遞角偕緋臣朱熹謹齋沐奉疏
東向再拜昧死獻於皇帝陛下臣伏覩三月九日陛下

可議臣之奏申勅監司郡守條具民間利病悉以上聞
無有所隱臣以布衣諸生蒙被聖恩待罪偏壘乃獲遭
值仁聖永言願治不間踈遠如此其敢不悉心竭慮以
塞詔旨然臣嘗病獻言者不維天下國家之大體而毛
舉細故以為忠聽言者不察天下國家之至計而抉擿
隱伏以為明是以獻言雖多而實無所益於人之國聽
言雖廣而實無以盡天下之美臣誠不佞然不敢專以
淺意小言仰奉明詔惟陛下幸於其大者垂聽而審行

之則天下幸甚臣嘗謂天下國家之大務莫大於恤民而恤民之實在省賦省賦之實在治軍若夫治軍省賦以爲恤民之本則又在夫人君正其心術以立紀綱而已矣董子所謂正心以正朝廷正朝廷以正百官正百官以正萬民正萬民以正四方蓋謂此也夫民之不可不恤不待智者而後能知亦不待明者然後能言也然欲知其憔悴困窮之實與其所以致此之由則臣請以所領之郡推之然後以次而及其所以施置之方焉臣

謹按南康為郡土地瘠薄生物不暢水源乾淺易得枯涸人民稀少穀賤農傷固已為貧國矣而其賦稅偏重比之他處或相倍蓰民間雖復盡力耕種所收之利不足以了納稅賦須至別作營求乃可陪貼輸官是以人無固志生無定業不肯盡力農桑以為子孫久遠之計幸遇豐年則賤糶禾穀以苟目前之安一有水旱則扶老攜幼流移四出視其田廬無異逆旅之舍蓋出郊而四望則荒疇敗屋在處有之故臣自到任之初即嘗具

奏乞且將星子一縣稅錢特賜蠲減又嘗具申提點坑冶司乞為敷奏將夏稅所折木炭價錢量減分數其木炭錢已蒙聖慈曲賜開允獨減稅事漕司相度方上版曹若得更蒙聖恩特依所請則一方憔悴困窮之民自此庶幾復有更生之望矣然以臣計之郡之接境江饒等州土田瘠薄類此者非一郡一縣而已也賦稅重大如此者非一料一色而已也若不大為經理深加隱恤雖復時於其間少有縱舍如以杯水掬一車薪之火恐

亦未能大有所濟而剝膚椎髓之禍必且愈深愈酷而不可救元氣日耗根本日傷一旦不幸而有方數千里之水旱則其橫潰四出將有不可如何者未知陛下何以處此此臣所謂民之憔悴困窮而不可不恤者然也而臣所謂省賦理軍者請復言之夫有田則有租為日久矣而今日民間特以稅重為苦者正緣二稅之入朝廷盡取以供軍而州縣無復贏餘也夫二稅之入盡以供軍則其物有常數其時有常限而又有貼納水腳轉輸

之費州縣皆不容有所寬緩而減免也州縣既無贏餘以給官吏養軍兵而朝廷發下離軍歸正等人又無紀極支費日增無所取辦則不免創於二稅之外別作名色巧取於民且如納米收耗則自七斗八斗以至於一倍而未止也豫借官物則自一年二年以至三年四年而未止也此外又有月椿移用諸雜名額拋賣乳香科買軍器寄招軍兵打造鐵甲之屬自版曹總所以至漕司上下相承遞相促迫今日追究人吏明日取勘知通

官吏無所從出不過一切取之於民耳蓋不如是無以補舊欠支目前雖明知其一旦發覺違法抵罪而不及顧也夫以罪及其身而不暇恤尚何暇於民之恤乎以此觀之則今日民貧賦重其所從來亦可知矣若不計理軍實而去其浮冗則民力決不可寬然國家感處東南恢復之勲未集所以養兵而固圉者常患其力之不足則兵又未可以遽減竊意惟有選將吏覈兵籍可以節軍資開廣屯田可以實軍儲練習民兵可以益邊備

誠能行此三者而又時出禁錢以續經用民力庶其可
寬也今將帥之選率皆膏粱騃子廝役凡流徒以趨走
應對為能苞苴結托為事物望素輕既不為軍士所服
而其所以得此差遣所費已是不貲以故到軍之日惟
務裒斂剝剝經營賈販百種搜羅以償債負債負既足
則又別生希望愈肆誅求蓋上所以奉權貴而求陞擢
下所以飾子女而快己私皆於此乎取之至於招收簡
閱訓習撫摩凡軍中之急務往往皆不暇及軍士既已

困於刻剥苦於役使而其有能者又不見有優異無能者或反見親寵怨怒鬱積無所伸訴平時既皆悍然有不服之心一旦緩急何由可恃至於軍中子弟亦有素習弓馬諳曉戰陣者例皆不肯就本軍投募而朝廷反為之分責州縣枉費錢物拖拽短小生疎無用之人以補軍額凡此數端本末巨細無不乖錯而所謂將帥者私欲飽滿鑽研有效則又可以束裝問塗而望他軍之積以為已資矣故近歲以來管軍臣僚遷代之速至有

一歲再易者是則不為軍中利病無由究知冗兵浮食
日益猥衆而此人之所盜竊破費與夫送故迎新百色
支用已不知其幾何矣至於總餽輸之任者亦皆負倚
幽陰交通賄賂其所程督駟催東南數十州之脂膏骨
髓名為供軍而輦載以輸於權倖之門者不可以數計
若乃屯田民兵二事又特為誕謾小人竊取官職之資
而未聞其有絲毫尺寸可見之效凡此數弊天下之人
孰不知之而任事之臣畧不敢一言以告陛下惟務迫

趣州縣使之急征橫賦戕伐邦本而其所以欺陛下者則曰如是而國可富如是而兵可強陛下亦聞其說之可喜而未究其實往往誤加獎寵畀以事權是以比年以來此輩類皆高官厚祿志滿意得而生民日益困苦無聊賴草茅有識之士相與私議竊歎以為莫大之禍必至之憂近在朝夕顧獨陛下未之知耳為今之計欲討軍實以紓民力則必盡反前之所為然後乃可興也蓋授將印委利權一出於朝廷之公議則可以絕苞苴

請託之私務求忠勇沉毅實經行陣曾立勞效之人則
可以革輕授非才之弊無苞苴請託之私則刻剝之風
可革將得其人則軍士畏愛奮厲蒐閱以時而竄名冗
食者不得容私於其間得人而久其任則上下相安緩
急可恃而又可以省送迎之費軍之汰卒與凡北來歸
正添差任滿之人皆可歸之屯田使之與民雜耕而漸
損其請給其有材勇事藝之人則計其品秩而多與之
田因以為什伍之長使教其人習於馳射擊刺行伍之

法罷去諸州招軍之令而募諸軍子弟之驍勇者別授以田使隸尺籍大抵令與見行屯田民兵之法相為表裏擇老成忠實通曉農兵之務者使領其事付以重權久其事任毋貪小利毋急近功俟其果能漸省列屯坐食之兵稍損州郡供軍之數然後議其課最增秩而因任之如此十數年間自然漸見功效若其功效未能遽見之間而欲亟圖所以紓州縣民間目前之急者則願深詔主計將輸之臣且於見今椿積金穀絹綿數內每

歲量撥二三十萬視州郡之貧乏者特與免起上供官
物三五分而代其輸向後軍籍既核屯田既成民兵既
練則上項量撥之數可以漸減而州郡免起之數可以
漸增州縣事力既益寬舒然後可以禁其苛斂責以寬
恤歲課而時稽之不惟去其加耗預借非法科敷之弊
又視其土之肥瘠稅之輕重而均減之庶幾窮困之民
得保生業無復流移漂蕩之意所在曠土亦當漸次有
人開墾布種而公上之賦亦當自然登足次第增羨不

侯程督迫促而國真可富兵真可強矣此臣所謂省賦
治軍之說然也至於所謂其本在於正心術以立紀綱
者則非臣職之所當及然天下萬事之根本源流有在
於是雖欲避而不言有不可得者且臣頃於隆興初元
誤蒙召對蓋已畧陳其梗槩矣今請昧死復為陛下畢
其說焉夫所謂綱者猶網之有綱也所謂紀者猶絲之
有紀也網無綱則不能以自張絲無紀則不能以自理
故一家則有一家之綱紀一國則有一國之綱紀若乃

鄉總於縣縣總於州州總於諸路諸路總於臺省臺省
總於宰相而宰相兼統衆職以與天子相可否而出政
令此則天下之綱紀也然而綱紀不能以自立必人主
之心術公平正大無偏黨反側之私然後綱紀有所係
而立君心不能以自正必親賢臣遠小人講明義理之
歸閉塞邪私之路然後乃可得而正也古先聖王所以
立師傅之官設賓友之位置諫諍之職凡以先後縱吏
左右維持惟恐此心頃刻之間或失其正而已原其所

以然者誠以天下之本在是一有不正則天下萬事將無一物得其正者故不得不謹也今天下之事如前所陳亦可見矣陛下欲恤民則民生日蹙欲理財則財用日匱欲治軍則軍政日紊欲恢復土宇則未能北向以取中原尺寸之土欲報雪讎恥則未能繫單于之頸而飲月氏之頭也此其故何哉宰相臺省師傅賓友諫諍之臣皆失其職而陛下所與親密所與謀議者不過一二近習之臣也此一二小人者上則蠱惑陛下之心

志使陛下不信先王之大道而悅於功利之卑說不樂
莊士之讜言而安於私讐之鄙態下則招集天下士大
夫之者利無恥者文武彙分各入其門所喜則陰為引
援擢寘清顯所惡則密行訾毀公肆擠排交通貨賂則
所盜者皆陛下之財命卿置將則所竊者皆陛下之柄
雖陛下所謂宰相師保賓友諫諍之臣或反出入其門
墻承望其風旨其幸能自立者亦不過齷齪自守而未
嘗敢一言以斥之其甚畏公論者乃畧能驚逐其徒黨

之一二既不能深有所傷而終亦不敢明言以擣其囊
索巢窟之所在勢成威立中外靡然向之使陛下之號
令黜陟不復出於朝廷而出於此一二人之門名為陛
下之獨斷而實此一二人者陰執其柄蓋其所壞非獨
壞陛下之綱紀而已乃并與陛下所以立綱紀者而壞
之使天下之忠臣賢士深憂永歎不樂其生而貪利無
恥敢於為惡之人四面紛然攘袂而起以求逞其所欲
然則民又安可得而恤財又安可得而理軍政何自而


修土宇何自而復而宗廟之讎恥又何時而可雪耶臣
誠至愚不勝憤懣因伏惟念自頃進對得竭狂瞽陛下
不唯赦而不誅其後十七八年間兩蒙收召五被除擢
雖臣愚暗自知無用於世又為疾病憂患之所牽留有
不得祇拜恩命者然陛下之知臣不為不深憐臣不為
不厚顧臣乃獨畏懦藏縮熟視天下之綱紀廢亂生靈
困苦至於如此而不能捐生出死一為陛下言之是陛
下不負臣而臣負陛下也今者幸值聖明開廣言路而

臣官守適在可言之數於此而又不言則臣之罪雖萬死不足以自贖是以敢冒言之伏惟陛下曲加容貸留神省察奮發剛斷一正宸心斥遠佞邪建立綱紀以幸四海困窮之民則臣不勝大幸干冒斧鉞臣無任瞻天望聖戰慄俟命之至臣熹昧死再拜謹言

貼黃

本軍管內去秋晚田旱損去冬地震有聲臣已各具奏聞去訖是後一向缺雨耕牛疫死今雖得雨恐已

後時而牛死不止勢甚可慮伏乞睿照臣昨蒙賜對
面奉玉音治天下當以正心誠意為本常切仰歎聖
學高明深達治本如此天下安得不治比年以來乃
聞道路之言妄謂陛下惡聞正心誠意之說臣下當
進對者至相告戒以為語忌臣雖有以決知其不然
然竊深慮此語流傳上累聖德下惑羣聽伏望睿明
更賜裁擇



古文集成卷五十七

欽定四庫全書

集部

古文集成卷五十八至六十一

詳校官中書臣沈 颺

助教臣常循覆勘

總校官檢討臣何思鈞

校對官助教臣卜惟吉

謄錄監生臣劉本立

欽定四庫全書

古文集成卷五十八

宋 王霆震 編

前辛集四

封事

戊申封事

朱文公

文公年譜云

疏入夜漏下七刻孝宗已就寢亟起秉燭讀之終篇翌日除主管太

乙宮兼崇政殿說書

十一月一日朝奉郎直寶文閣主管西京嵩山崇福宮

臣朱熹謹齋沐具疏昧死再拜獻於皇帝陛下臣切觀今日天下之勢如人之有重病內自心腹外達四肢蓋無一毫一髮不受病者雖於起居飲食未至有妨然其危迫之證深於醫者固已望而走矣是必得如盧扁華陀之輩投以神丹妙劑為之湔腸滌胃以去病根然後可以幸於安全如其不然則病日益深而病者不覺其可寒心殆非俗醫常藥之所能及也故臣前日之奏輒引藥不瞑眩厥疾不瘳之語意蓋為此而其言有未盡

也然天下之事所當言者不勝其衆獨以天下之大本為今日之急務深為陛下言之蓋天下之大本者陛下之心也今日之急務輔翼太子選任大臣振舉綱維變化風俗愛養民力修明軍政六者是也臣請昧死而悉陳之惟陛下之留聽焉臣之輒以陛下之心為天下之大本者何也天下之事千變萬化其端無窮而無一不本於人主之心者此自然之理也故人主之心正則天下之事無一不出於正人主之心不正則天下之事無

一得由於正蓋不惟其賞之所勸刑之所威各隨所向
勢有不能已者而其觀感之間風動神速又有甚焉是
以人主以眇然之身居深宮之中其心之邪正若不可
得而窺者而其符驗之著於外者常若十目所視十手
所指而不可掩此大舜所以有惟精惟一之戒孔子所
以有克己復禮之云皆所以正吾此心而為天下萬事
之本也此心既正則視明聽聰周旋中禮而身無不正
是以所行無過不及而能執其中雖以天下之大而無

一人不歸吾之仁者

臣謹按尚書舜告禹曰人心惟危

心虛靈知覺一而已矣而以為有人心道心之別者何哉蓋以其或生於形氣之私或原於性命之正而所以為知覺者不同是以或危殆而不安或之微而難見耳然人莫不有是形故雖上智不能無人心亦莫不有是性故雖下愚不能無道心二者雜乎方寸之間而不知所以治之則危者愈危微者愈微而天理之公卒無以勝乎人欲之私矣精則察夫二者之間而不雜也一則守其本心之正而不離也從事於斯無少間斷必使道心常為一身之主而人心每聽命焉則危者安而微者著動靜云為自無過不及之差矣又按論語顏淵問仁子曰克己復禮為仁一日克己復禮天下歸仁焉為仁由已而由人乎哉夫仁者本心之全德也已者一身之私欲也禮者天理之節文也蓋人心之全德莫非天理之所為然既有是身則亦不能無人欲之私以害焉故

為仁者必有以勝其私欲而復於禮則事皆天理而本
心之德復全於我也心德既全則雖以天下之大而無
一人不歸吾之仁者然其機則固在我而不在人也日
日克之不以為難則私欲淨盡天理流行而仁不可勝
用矣此大舜孔子之言而臣輒妄論
其所以用力之方如此伏乞聖照然邪正之驗著於

外者莫先於家人而次及於左右然後有以達於朝廷
而及於天下焉若宮闈之內端莊齊肅后妃有闕睢之
德後宮無盛色之譏貫魚順序而無一人敢恃恩私以
亂典常納賄賂而請行謁此則家之正也退朝之後從
容燕息貴戚近臣攜僕奄尹陪侍左右各恭其職而上

憚不惡之嚴下謹戴盆之戒無一人敢通內外竊威福
招權市寵以紊朝政此則左右之正也內自禁省外徹
朝廷二者之間洞然無有毫髮邪私之間然後發號施
令羣聽不疑進賢退奸衆志成服紀綱得以振而無侵
撓之患政事得以修而無阿私之失此所以朝廷百官
六軍萬民無敢不出於正而治道畢也心一不正則是
數者固無從而得其正是數者一有不正而曰心正則
亦安有是理哉是以古先聖王兢兢業業特守此心雖

在紛華波動之中幽獨得肆之地而所以精之一之克之復之如對神明如臨淵谷未嘗敢有須臾之急然猶恐其隱微之間或有差失而不自知也是以建師保之官以自開明列諫諍之職以自規正而凡其飲食酒水衣服次舍器用財賄與夫宦官宮妾之政無一不領於冢宰之官使其左右前後一動一靜無不制以有司之法而無一芥之隙瞬息之頃得以隱其毫髮之私蓋雖以一人之尊深居九重之邃而凜然常若立乎宗廟之

中朝廷之上此先王之治所以由內及外自微至著精粹純白無少瑕翳而其遺風餘烈猶可以為後世法程

也

臣切見周禮天官冢宰一篇乃周公輔導成王垂法後世用意最深切處欲知三代人主正心誠意之學

於此考之可見其實伏乞聖照

陛下試以是思之吾之所以精一克復

而持守其心者果嘗有如此之功乎所以修身齊家而正其左右者果嘗有如此之效乎宮省事禁臣固有不
得而知者然不見其形而視其影不覩其內而覘其外則
爵賞之濫貨賂之流閭巷竊言久已不勝其藉藉矣臣

切以是窺之則陛下之所以修之家者恐其未有以及古之聖王也至於左右便嬖之私恩遇過當往者淵覲說怵之徒勢焰熏灼傾動一時今已無可言矣獨有前日臣所面奏者切以為此輩但當使之守門傳命供掃除之役不當假借崇長使得逞邪媚作淫巧於內以蕩上心立門庭招權勢於外以累聖政而其有才無才有罪無罪自不當論況其有才適所以為奸有罪而不可復用乎且如向來主管喪事飲食几筵之命遠近傳聞

無不切笑臣不知國史書之野史記之播於夷狄傳於
後世且以陛下為何如主也縱有曲折如前日所以諭
臣者陛下亦安能家置一喙而人曉之耶刑餘小醜不
比人類顧乃熒惑聖心虧損聖德以至此極而公卿大
臣拱手熟視無一言以救其失臣之痛心始者惟在於
此比至都城則又知此曹之用事者非特此人而侍從
之臣蓋已有出其門者

臣伏見陛下即位以來臣下稍有知識無不以此事為言者既

皆不蒙聽納甚者或至抵罪故自近年以來無復有言
此者蓋知其根株牢固不可動搖言之無益徒取乖咎

以致所言他事亦不見用故置此事於度外而姑論其次耳不唯如此亦以過失之萌人所創見故以為異而爭言之及其既久則習熟見聞以為常事而不足言正如近年冬雷秋雪時時有之人遂不以為異然此豈可常之理哉惟臣愚暗不識時宜故今日猶復論此人所諱言而厭道之事雖幸不蒙誅斥而亦未見有所施行也臣竊思之必使陛下聽踈遠之言而逐其平日深所愛幸之人誠有所難能者然此事利害既陳於前而臣所深憂又恐其不可為後世法也伏惟陛下深為宗社子孫萬世之慮忍而行之天下幸甚至其納

財之塗則又不於士大夫而專於將帥臣於前日亦嘗輒以面奏而陛下諭臣以為誠當深察而痛懲之矣退而始聞陛下比於環列之尹已嘗有所易置乃知陛下

固已深察其弊而無所待於人言然猶未嘗明正其罪而反寵以崇資巨鎮使即便安此曹無知何所忌憚况

中外將帥其不為此者無幾陛下亦未能推其類而悉

去之也

臣切聞之道路自王莽既逐之後諸將差除多出此人之手蓋莽與此人專為諸將交通內侍

納賂買官得其旨意風喻軍中等第論薦以欺陛下實將帥之牙僧也今雖去之而未正其罪又聞向者鄂帥剋剝之事亦是此人內外營救遂致罪人漏網言者被罪中外至今為之不平既而又有匿名揭榜暴其過惡者亦被決配此不惟行遣太偏足為聖政之累而自此之後遂無復有人敢言諸將之罪者以小人握重兵或在周廬肘腋之間或在江湖千里之外而中外無一人敢白其奸此於國計深恐未便前代之鑒蓋亦非細伏

乞陛下少
留聖慮

陛下竭生靈之膏血以奉軍旅之費本非得已而為軍士者顧乃未嘗得一溫飽甚者採薪織屨掇拾糞壤以度朝夕其又甚者至使妻女盛塗澤倚市門以求食也怨詈謗讟悖逆絕理至有不可聞者一有緩急不知陛下何所倚仗是皆為將帥者巧為名色頭會箕斂陰奪取其糧賜以自封殖而行貨賂於近習以圖進用彼此既厭足矣然後時以薄少號為羨餘陰奉燕私之費以嫁士卒怨怒之毒於陛下且幸陛下一受其

獻則後日雖知其罪而不得復有所問也出入禁闥腹
心之臣外交將帥共為欺蔽以至於此豈有一毫愛戴
陛下之心哉而陛下不悟反寵昵之以是為我之私人
至使宰相不得議其制置之得失給諫不得論其除授
之是非以此而觀則陛下所以正其左右未能及古之
聖王又明矣且私之得名何為也哉據已分之所獨有
而不得以通乎其外之稱也故自匹夫而言則以一家
為私而不得以通乎其鄉自鄉人而言則以一鄉為私

而不得以通乎其國自諸侯而言則以一國為私而不得以通乎天下至於天子則際夫天之所覆極地之所載莫非已分之所有而無外之不通矣又何以私為哉今以不能勝其一念之邪而至於有私心以不能正其家人近習之故而至於有私人以私心用私人則不能無私費於是內損經費之入外納羨餘之獻而至於有私財陛下上為皇天之所子全付所覆使其無有私而不公之處其所以與我者亦不細矣乃不能充其大而

自為割裂以狹小之使天下萬事之弊莫不由此而出

是豈不可惜也哉

臣竊聞太祖皇帝改營大內既成躬御正殿洞開重門顧謂侍臣曰此如

我心少有邪曲人皆見之竊謂太祖皇帝不為文字言語之學而其方寸之地正大光明直與堯舜之心若合符節此其所以肇造區夏而垂裕无疆也伏惟陛下遠稽前聖而近以皇祖之訓為法則一心克正而遠近莫敢不一於正矣伏乞聖照若以時勢之利害言之則天下之勢合則

彊分則弱故諸葛亮之告其君曰宮中府中俱為一體

陟罰臧否不宜異同若有作奸犯科及為忠善者宜付

有司論其刑賞以昭陛下平明之理不宜偏私使內外

異法也當是之時昭烈父子以區區之蜀抗衡天下十分之九規取中原以興漢室以亮忠智為之深謀而其策不過如此可謂深知時務之要而暗合乎先王之法矣夫以蜀之小而於其中又以公私自分彼此如兩國然則是將以梁益之半圖吳魏之全又且內小人而外君子廢法令而保姦回使內之所出者日有以賊乎外公之所立者常不足以勝乎私則是此兩國者又自相攻而其內之私者常勝外之公者常負也外有鄰敵之

虞內有陰邪之寇日夜夾攻而不置為國家者亦已危矣夫以義理言之既如彼以利害言之又如此則今日之事如不蚤正臣恐陛下之心雖勞於求賢而一有所妨乎此則賢人必不得用而所用者皆庸繆愼巧之人雖勤於立政而一有所碍乎此則善政必不得立而所行者皆阿私苟且之政日往月來養成禍本而貽燕之謀未遠輔相之職不修紀綱壞於上風俗壞於下民愁兵怨國勢日卑一旦猝有不虞臣切寒心不知陛下何

以善其後也然則臣之所謂天下大本惟在陛下之一

心者可不汲汲皇皇而求有以正之哉

臣昨來面奏劄子內一節云伏

願陛下自今以往一念之萌則必謹而察之此為天理耶為人欲耶果天理也則敬以廣之而不使其少有壅闕果人欲也則敬以克之而不使其少有凝滯惟而至於言語動作之間用人處事之際無不以其是裁之知其為是而行之則行之惟恐其不力而不當憂其力之過也知其為非而去之則去之惟恐其不果而不當憂其果之甚也知其為賢而用之則任之惟恐其不專聚之惟恐其不衆而不當憂其為黨也知其為不肖而退之則退之惟恐其不速去之惟恐其不盡而不當憂其有偏也如此則聖心洞然中外融徹無一毫之私欲得以介乎其間而天下之事將為陛下之所為無不如志矣今恐日久元本不存再此具奏伏乞聖照至於

輔翼太子之說則臣前日所謂數世之仁者蓋已微發其端而未敢索言之也夫太子天下之本其輔翼之不可不謹見於保傅傳者詳矣陛下聖學高明洞貫古今宜不待臣言而諭然臣嘗竊怪陛下所以調護東宮者何其踈畧之甚也由前所論而觀之豈非所以自治者猶未免於踈畧因是亦以是為當然而不之慮耶夫自王十朋陳良翰之後宮寮之選號為得人而能稱其職者蓋已鮮矣而又時使邪佞僇薄闖冗庸妄之輩或得

參錯於其間所謂講讀聞亦姑以應文備數而未聞其有箴規之效至於從容朝夕陪侍遊燕者又不過使宦官數輩而已皇太子睿性夙成閱理久熟雖若無待於輔導然人心難保習氣易汙習於正則正習於邪則邪此古之聖王教世子者所以必選端方正直道術博聞之士與之居處而又使之逐去邪人不使見惡行蓋常謹之於微不待其有過而後規也今三代之制或不可考正以唐之六典論之東宮之官師傅賓客既職輔

導而詹事府兩春坊實擬天子之三省故以詹事庶子領之其選甚重今則師傅賓客既不復置而詹事庶子有名無實其左右春坊遂直以使臣掌之何其輕且褻之甚耶夫立太子而不置師傅賓客則無以發其隆師親友尊德樂義之心獨使春坊使臣得侍左右則無以防其戲慢嫖狎奇袤雜進之害此已非細事矣至於皇孫德性未定聞見未廣又非皇太子之比則其保養之具尤不可以不嚴而今日之官屬尤不備責任尤不專

豈任事者亦有所未之思耶謂宜深詔大臣討論前代典故東宮除今已置官外別置師傅賓客之官使與朝夕遊處罷去春坊使臣而使詹事庶予各復其職宮中之事一言之入一令之出必由於此而後通焉又置贊善大夫擬諫官以箴闕失王府則宜稍倣六典親王之制置傳友諮議以司訓導置長史司馬以總衆職妙選耆德不雜他材皆置正員不為兼職明其職掌以責功效則其官屬已畧備矣陛下又當以時召之使侍燕遊

從容啓迪凡古先聖王正心修身平治天下之要陛下之所服行而已有效與其勉慕而未能及愧悔而未能免者傾倒羅列悉以告之則聖子神孫皆將有以得乎陛下心傳之妙而宗社之安統業之固可以垂於永久

而無窮矣此今日急務之一也

臣伏見比者聖詔令皇太子參決庶務此見聖

慮之深將使皇太子以時習知國家政事之得失也然臣之愚見則以為使之習事不若勉其修德況今皇太子育德春宮幾二十年其於天下之事蓋不待習而無不熟矣獨恐正心修德之學未至而於物慾之私未免有所繫累則雖習於其事而或不能自決於取舍之間故臣切論輔養之未至者非有他也但欲陛下更留聖

意於此而已
伏乞聖照

至於選任大臣之說則臣前所謂勞於求
賢而賢人不得用者蓋已發其端矣夫以陛下之聰明
豈不知天下之事必得剛明公正之人而後可任也哉
其所以常不得如此之人而反容鄙夫之竊位者非有
他也直以一念之間未能撤其私邪之蔽而燕私之好
便嬖之流不能盡由於法度若用剛明公正之人以為
輔相則恐有以妨吾之事害吾之人而不得肆是以選
掄之際常先排擯此等寘之度外而不取凡疲懦軟熟

平日不敢直言正色之人而揣摩之又於其中得其至庸極陋決可保其不至於有所妨者然後舉而加之於位是以除書未出而其物色先定姓名未顯而中外已逆知其決非天下之第一流矣故以陛下之英明剛斷畧不世出而所取以自輔者未嘗有如汲黯魏徵之比顧常反得如秦檜晚年之執政臺諫者而用之彼以人臣竊國柄而畏忠言之悟主以發其奸也故專取此流以塞賢路蔽主心乃其勢之不得已者陛下尊居宸極

威福自己亦何賴於此輩而乃與之共天下之政以自蔽其聰明自壞其綱紀而使天下受其弊哉夫其所以取之者如此故其選之不得而精選之不精故任之不得而重任之不重則彼之所以自任者亦輕夫以至庸之材當至輕之任則雖名為大臣而其實不過供給唯諾奉行文書以求不失其窠坐資給如吏卒之為而已求其有以輔聖德修朝政而振紀綱不待智者而知其必不能也下此一等則惟有作奸欺植黨與納貨賂以

濁亂陛下之朝廷耳其尤甚者乃至十有餘年而後敗
露以去然其列布於後以希次補者又已不過此等人
矣蓋自其為臺諫為侍從而其選已如此其後又擇其
尤碌碌者而登用之則亦無怪乎陛下常不得天下之
賢材而屬任之也然方用之之初亦曰姑欲其無所害
於吾之私而已夫豈知其所以害夫天下之公者乃至
於此哉陛下試反是心以求之則庶幾乎得之矣蓋不
求其所喜而求其可畏不求其能適吾意而求其能輔

吾德不憂其自任之不重而常恐吾所以任之者之未重
不為燕私近習一時之計而為宗社生靈萬世無窮之
計陛下誠以此取之以此任之而猶曰不得其人則臣
不信也此今日急務之二也至於振肅紀綱變化風俗
之說則臣前所謂勤於立政而善政卒不得立者亦已
發其端矣夫以陛下之心憂勤願治不為不至豈不欲
夫綱維之振風俗之美哉但以一念之間未能去其私
邪之蔽是以朝廷之上忠邪雜進刑賞不分士大夫之

間志趣卑汙廉恥廢壞顧猶以為事理之當然而不思有以振厲矯革之也蓋明於內然後有以齊乎外無諸已然後可以非諸人今宮省之間禁密之地而天下不公之道不正之人顧乃得以窟穴盤踞於其間而陛下目見耳聞無非不公不正之事則其所以薰蒸銷鑠使陛下好善之心不著疾惡之意不深其害已有不可勝言者矣及其作奸犯法則陛下又未能深割私愛而付諸外廷之議論以有司之法是以紀綱不能無所撓敗

而所以施諸外者亦因是而不欲深究切之且如頃年方伯連帥嘗有以賊汙不法聞者矣鞠治未竟而已有與郡之命及臺臣有言則遂與之祠祿而理為自陳至於其所藏匿作過之人則又不復逮捕付獄名為降官而實以解散其事此雖宰相曲庇鄉黨以欺陛下然臣切意陛下非全然不悟其欺者意必以為人情各有所私我既欲遂我之私則彼亦欲遂彼之私君臣之間顏情稔熟則其勢不得不少容之且以為雖或如此亦未

至甚害於事而不知其敗壞綱紀使中外聞之腹非巷
議皆有輕侮朝廷之心奸賊之吏則皆鼓舞相賀不復
畏陛下之法令則亦非細故也又如廷臣爭議配享其
間邪正曲直固有所在則兩無所問而并去之監司挾
私以誣郡守則不問其曲直而兩皆罷免監司使酒以
凌郡守亦不問其曲直而兩皆與祠宰相植黨營私孤
負任使則曲加保全而使之去臺諫懷其私恩陰拱不
言而陛下亦不之問也其有初自小官擢為臺諫三四

年聞趨和承意不能建明一事則年除歲遷至極其選
一日論及一二武臣罪惡則便斥為郡守而不與職名
從臣近典東畿遠帥西蜀一遭飛語則體究具析無所
不至及究析來上而所聞不實則言之者晏然一無所
訶山陵諸使鬻賣辟闕煩擾吏民御史有言亦無行遣
而或反得超遷御史言及畿漕則名補卿列而實奪之
權其所言者則雖量加絀削而繼以進用

臣伏見近年
惟有王張近

習一事賞信罰必無所假借自餘百事多務含容曲直
是非兩無所問似聞聖意以謂如此處置方得均平此

誠堯舜之用心也然臣於此切有疑焉若非其本則臣固已妄論於前只據平之一字而言則臣於易象稱物平施之言切有感也蓋古之欲為平者必稱其物之大小高下而為其施之多寡厚薄然後乃得其平若不問其是非曲直而待之如一則是善者常不得伸而惡者反幸而免以此為平是乃所以為大不平也故雖堯舜之治既舉元凱必放共兜此又易象所謂遏惡揚善順天休命者也蓋善者天理之本然惡者人欲之邪妄是以天之為道既福善而禍淫又以賞罰之權寄之司牧使之有以補助其禍福之所不及然則為人君者可不謹執其柄而務有以奉承之哉伏惟陛下深留聖意從班之中賢否尤雜至於終歲緘默不聞一言以裨聖聽者顧亦隨羣逐隊排連僨補其桀黠者乃敢造飛語立橫議如臣前所陳者而宰

相畏其凶焰反撓公議而從之臺諫亦不敢以聞於陛

下而請其罪

臣聞古先聖王敦求哲人俾輔後嗣然則今日正是博求賢能置之列位之時而此

人趣操不謹俱為身害乃敢陰為讒慝公肆劫時遂其奸謀不為國計欲望聖慈密賜宣問

陛下視

此綱紀為如何耳可不反求諸身而亟有以振肅之耶
綱紀不正於上是以風俗頽敗於下蓋其為患之日久
矣而浙中為尤甚大率習為軟美之態依阿之言而以
不分是非不辨曲直為得計下之事上固不敢少忤其
意上之御下亦不敢稍拂其情惟其私意之所在則千

塗萬轍經營計較必得而後已甚者以金珠為脯醢以契券為詩文宰相可啗則啗宰相近習可通則通近習惟得之求無復廉恥父詔其子兄勉其弟一用此術而不復知有忠義名節之可貴其俗已成之後則雖賢人君子亦不免習於其說一有剛毅正直守道循理之士出乎其間則羣譏衆排指為道學之人而加以矯激之罪上惑聖德下鼓流俗蓋自朝廷之上以及閭里之間十數年來以此二字禁錮天下之賢人君子復如崇宣

之間所謂元祐學術者排擯詆辱必使無所容措其身而後已嗚呼此豈治世之事而尚復忍言之哉又其甚者乃敢誦言於衆以為陛下嘗謂今日天下幸無變故雖有伏節死義之士亦何所用此言一播大為識者之憂而臣有以知其必非陛下之言也夫伏節死義之士當平居無事之時誠若無所用者然古之人君所以必汲汲以求之者蓋以如此之人臨患難而能外死生則其在平世必能輕爵祿臨患難而能盡忠節則其在平

世必能不詭隨平日無事之時得而用之則君心正於上風俗美於下足以逆折奸萌潛消禍本自然不至真有伏節死義之事非謂必知後日當有變故而預蓄此人以擬之也惟其平日自恃安寧便謂此等人才必無所用而專取一種無道理無學識重爵祿輕名義之人以為不務矯激而尊寵之是以綱紀日壞風俗日偷非常之禍伏於冥冥之中而一旦發於意慮之所不及平日所用之人交臂降叛而無一人可同患難然後前日

擯棄流落之人始復不幸而著其忠義之節以天寶之亂觀之其將相貴戚近幸之臣皆已頓顙賊庭而起兵討賊卒至於殺身湛族而不悔如巡遠杲卿之流則遠方下邑人主不識其面目之人也使明皇早得巡等而用之豈不能銷患於未萌巡等早見用於明皇又何至真為伏節死義之舉哉商鑒不遠在夏后之世此識者所以深憂於或者之言也雖以臣知陛下聖學高明識慮深遠決然不至有此議論然每念小人敢託聖訓以

蓋其奸而其為害至於足以深沮天下忠臣義士之氣則亦未嘗不痛心疾首而不敢以識者之慮為過計之憂也陛下視此風俗為如何可不反求諸身而亟有以變革之耶此今日急務之三四也至於愛養民力修明軍政之說則民力之未裕生於私心之未克而宰相臺諫失職也軍政之未修生於私心之未克而近習得以謀帥也是數說者臣皆已極陳於前矣今請即民力之未裕而推言之臣聞虞允文之為相也盡取版曹歲入

窠名之必可指擬者號為歲終羨餘之數而輸之內帑顧以其有名無實積累掛欠空載簿籍不可催理者撥還版曹其為說曰內帑之積將以備他日用兵進取不時之須而版曹目今經費已自不失歲入之數聽其言誠甘且美矣然自是以來二十餘年內帑歲入不知幾何而認為私貯典以私人宰相不得以式貢均節其出入版曹不得以簿書勾考其在亡其日銷月耗以奉燕私之費者蓋不知其幾何矣而曷嘗聞其能用此錢以

充軍中之用如太祖皇帝之言哉徒使版曹經費缺乏
日甚督趣日峻以至廢去祖宗以來破分良法而必以
十分登足為限以為未足則又造為比較監司郡守殿
最之法以誘脅之不復問其政教設施之得失而一以
其能剝民奉上者為賢於是中外承風競為苛急監司
明諭州郡郡守明諭屬邑不必留心民事惟務催督財
賦此民力之所以重困之本而稅外無名之賦如和買
折帛科罰月椿之屬尚未論也

臣伏見祖宗舊法凡州
縣催理官物已及九分

以上謂之破分諸司即行住催版曹亦置不問由是州縣得其贏餘以相補助貧民些小拖欠亦得遷延以待蠲放恩自朝廷惠及閭里民兩足公私俱便此誠不刊之令典也昨自曾懷用事始除此法盡刷州縣舊欠以為隱漏悉行拘催於是民間稅物豪分銖兩盡要登足曾懷以此進身遂取宰相而生靈受害冤痛日深得財失民猶為不可況今政煩賦重民卒流亡所謂財者又將無有可得之理若不早救必為深害臣每讀大學卒章見其所論小人之使為國家菑害並至雖有善者亦無如之何者其言丁寧痛切未嘗不為寒心惟陛下少留聖意亟發德音以幸天下 其次則陛下所用之宰相不能擇中外

大吏而惟徇私情之厚薄所用之臺諫不能公行糾劾而惟快已意之愛憎是以監司郡守多不得人而其賢

者或反以舉職業忤臺諫而遭斥逐也至於監司太多而事權不歸於一銓法雖密而縣令未嘗擇人則又其法之有未善者然其本正則此等不難區處其本未正則雖或舉此臣恐未見其益而反有害也又嘗即夫軍政之不修而推之則臣聞日者諸將之求進也必先培植士卒以殖私財然後以此自結於陛下之私人而祈以姓名達於陛下之貴將貴將得其姓名即以付之軍中使自什伍以上節次保明稱其材武堪任將帥然後

具為奏牘而言之陛下之前陛下但見其等級推先案牘具備則誠以為公薦而可得人矣而豈知其諧價輸錢已若晚唐之債帥哉只此一事有耳者無不聞有口者無不道然以其門戶幽深蹤跡詭秘故無路得以窺其交通之實狀是以雖或言之而陛下終不信也夫將者三軍之司命而其選置之方乖刺如此則彼智勇材畧之人其孰肯抑心下首於宦官宮妾之門而陛下之所得以為將帥者皆庸夫走卒固不知兵謀師律之為

何事而惟剝剝之是先交結之是圖矣陛下不知其然而猶望其修明軍政激勸士卒以彊國勢豈不誤哉然將帥之不得人非獨士卒之受其弊也推其為害之極則又有以及乎民者蓋將帥得人則尺籍嚴而儲蓄羨屯田立而漕運省今為將帥者如此則固無望其肯核軍實而豐儲蓄矣至於屯田則彼自營者尤所不願故朝廷不免為之別置使者以典治之而兵屯之衆資其撥遣則又不免使參其務然聞其占護軍人不肯募其

願耕者以行而強其不能者以往至屯則偃蹇不耕而反為民田之害使者文吏其力蓋有所不能制者是以陛下欲為之切而久不得成也屯田不立漕運煩費諸州苗米至或盡數起發而無以供州兵之食則加耗斛面之弊紛紛而起而民益困矣又凡和買折帛科罰月椿之類往往亦為供軍之故而不可除若屯田立而所資於諸路者減則此屬庶乎其皆可禁矣今乃不然則是置將之不善而害足以及民也凡此數者根株深固

枝條廣闊若不可以朝變而夕除者然究其本則亦在夫陛下之反諸身耳聖心誠無不正則必能出私帑以歸版曹矣版曹不至甚缺必能復破分之法除殿最之科以寬州縣矣聖心誠無不正則必能擇宰相以選牧守矣擇臺諫以公刺舉矣聖心誠無不正則必能嚴官官兵將交通之禁而以屬將屬宰相矣宰相誠得其人則必能為陛下擇將帥以作士氣討軍實廣屯田以省漕運矣上自朝廷下達州縣治民典軍之官既皆得人

然後明詔宰相議省監司之員而精其選重其責又詔銓曹使以縣之劇易分為等差而常切詢訪天下之官吏能為縣者不拘薦舉之有無不限資格之高下而籍其姓名使以次補最劇之縣果有治績則優而進之不勝其任則黜而退之凡州縣之間無名非理之供橫斂巧取之政其泰甚而可去者可以漸去而民力庶乎其可寬矣至於屯田之利則以臣愚見當使大將募軍士使者招游民各自為屯不相牽制其給授課督賞罰政

令各從本司自為區處軍中自有將校可使不須別置
官吏使者則聽其辟置官屬三五人指使一二十人以
備使令又擇從官通知兵農之務兼得軍民之情者一
員為屯田使總治兩司之政而通其奏請趣其應副又
以歲時按行察其勤惰之實以行誅賞如此則兩屯心
競各務其功田事可成漕運可省而諸路無名非理之
供橫斂巧取之政前日有所不獲已而未可盡去者今
亦可以悉禁民力庶乎其益裕矣此今日急務之五六

也屯田一事如臣之策亦是將來將帥得人之後方可施行若將帥止如今日却恐徒壞漕司已成之功無補將帥兵屯之實且乞指揮趣此水災之後廣招流亡并行民屯之策以俟見效仍詔漕臣更切詢訪利病之未盡者條具以聞然後隨事商量及時措置庶幾已成之緒不至動搖輕有廢壞伏乞聖照凡此六

事皆不可緩而其本在於陛下之一心一心正則六事無不正一有人心私欲以介乎其間則雖欲億精勞力以求正夫六事者亦將徒為文具而天下之事愈至於不可為矣故所謂天下之大本者又急務之最急而尤不可以少緩者惟陛下深留聖意而亟圖之使大本誠

正急務誠修而治效不進國勢不强中原不復仇讎不
滅則臣請伏斧鉞之誅以謝陛下陛下雖欲赦之臣亦
不敢承也然又竊聞之今日士大夫之論其與臣不同
者非一及究其實則皆所謂似是而非者也蓋其樂因
循之無事者則曰陛下之年寢高而天下亦幸無事年
寢高則血氣不能不衰天下無事則不宜更為庸人所
擾其欲奮厲而有為者則又曰祖宗之積憤不可以不
攄中原之故疆不可以不復以此為務則聖心不待勸

勉而自強舍此不圖則雖欲策厲以有為而無所向往
以為標準亦卒歸於委靡而已凡此二說亦皆有理而
臣輒皆以為非者蓋樂因循者知聖人之血氣有時而
衰而不知聖人之志氣無時而衰也知天下有事之不
可以苟安而不知天下無事之尤不可以少怠也況今
日之天下又未得為無事乎且以衛武公言之其年九
十有五矣猶箴儆於國以求規諫而作抑戒之詩以自
警使人朝夕誦之不離於其側此其年豈不甚高而其

戒謹恐懼之心豈以是而少衰乎況陛下視武公之年
三分未及其二而責任之重地位之高又有十百千萬
於武公者臣雖不肖又安敢先處陛下於武公之下而
直謂其不能乎且天下之事非艱難多事之可憂而宴
安酖毒之可畏政使功成治定無一事之可為尚當朝
兢夕惕居安慮危而不可以少怠況今天下雖若未有
目前之急然民貧財匱兵惰將驕外有強暴之勁敵內
有愁怨之軍民其他難言之患隱於耳目之所不加思

慮之所不接者近在堂與之間而遠在數千里之外何

可勝數

堂與之說已陳於前此句更乞陛下少留聖意

追計其前既未有可見

之效却顧於後又未有可守之規

臣切見尋常之人將欲屬人以一至微不至

細之事猶必為規模使其盡善然後所屬之人有所持循而不失吾之所以屬之之意況有天下者將以天下至大之事屬之於人而不先為盡善可守之規以授之乎然臣於此事不敢盡言若蒙聖明少加聖慮則當此之時誠亦一新德業重整綱維不可失之機

會也臣狂妄僭率罪當萬死伏惟陛下裁赦

亦安得遽

謂無事而遂以逸豫處之乎其思奮厲者又徒知恢復

之不可忘頽墮之不可久然不知不世之大功易立而

至微之本心難保中原之強敵易禦而一己之私意難除也誠能先其所難則其易者將不言而自辦不先其難而徒欲僥倖於其易則雖朝夕談之不絕於口是亦徒為虛言以快一時之意而已又況此事之失已在隆興之初不合遽然罷兵講和遂使宴安酖毒之害日滋日長而坐薪嘗膽之志日遠日忘是以數年以來綱維解弛釁孽萌生區區東南事猶有不勝慮者何恢復之可圖乎故臣不敢隨例迎合苟為大言以欺陛下而所

望者則惟欲陛下先以東南之未治為憂而正心克己以正朝廷修政事庶幾真實功效可以馴致而不至於別生患害以妨遠圖蓋所謂善易者不言易而真有志於恢復者果不在於撫劍抵掌之間也論者又或以為陛下深於老佛之學而得其識心見性之妙於古先聖王之道蓋有不約而自合者是以不悅於世儒之常談死法而於當世之務則寧以管商一切功利之說為可取今乃以其所厭飫鄙薄者陳於其前亦見其言愈多

而愈不合也臣以為此亦似是而非之論非所以進盛德於日新也彼老子浮屠之說固有疑於聖賢者矣然其實不同者則此以性命為真實而彼以性命為空虛也此以為實故所謂寂然不動者萬理粲然於其中而民彝物則無一之不具所謂感而遂通天下之故則必順其事必循其法而無一事之或差彼以為空則徒知寂滅為樂而不知其為實理之原徒知應物見形而不知其有真妄之別也是以自吾之說而修之則體用一

原顯微無間而治心修身齊家治國無一事之非理由
彼之說則其本末橫分中外斷絕雖有所謂廓徹靈通
虛靜明妙者而無所救於滅理亂倫之罪顛倒運用之
失也故自古為其學者其初無不似有可喜考其終則
詖淫邪遁之見鮮有不作而害於政事者是以程顥常
闢之曰自謂窮神知化而不足以開物成務言為無不
周徧而實外於倫理窮深極微而不可以入堯舜之道
天下之學自非淺陋固滯則必入於此是謂正路之榛

蕪聖門之蔽塞闢之而後可與入道嗚呼此真可謂理
到之言惜乎其未有以聞於陛下者使陛下過聽髡徒
誑妄之說而以為真有合於聖人之道至分治心治身
治人以為三術而以儒者之學為最下則臣切為陛下
憂此心之害於政事而惜此說之布於來今也如或未
以臣言為然則聖質不為不高學之不為不久而所以
正心修身以及天下者其效果安在也是豈可不思其
所以然者而亟反之哉

臣聞仁宗時有程顥者與其弟頤同受學於周敦頤實得孔孟

以來不傳之緒同時又有邵雍張載相與博約遂使聖道闇而復明其功甚大俗儒淺學既不足以窺其蘊奧奸人鄙夫又以其言居必誠敬動由禮義有害於己之所為以故相與怨疾指為道學而加詆訕焉臣已畧論於前矣夫世俗無知既以道學為不美則是必欲舉世之人俱無道俱不學悉如己之所為而後適於其意耳邪說肆行人心頗僻無所忌憚乃至於此此正閔馬父之所深憂也今敦頤等所著之書頗藏冊府陛下試取而觀之聖學高明必將有默相契合而見諸行事者若遂於此賜一言以表章之則正心之效不惟自得而所以正人心亦在是矣伏惟陛下深留聖意也

若夫管商功利之說則又陋矣陛下所以取之者則以既斥儒者之道為常談死法而天下之務日至於前彼浮屠之學又不足以應之是以

有味乎彼之言而冀其富國強兵或有近效耳然自行其說至今幾年而國日益貧兵日益弱所謂近效者亦未之見而聖賢所傳生財之道理財之義文武之政道德之威則固所以為富強之大而反未有講之者也豈不誤哉今議者徒見老佛之高管商之便而聖賢所傳明善誠身齊家治國平天下者初無新奇可喜之說遂以為常談死法而不足學夫豈知其常談之中自有妙理死法之中自有活法固非老佛管商之陋所能彷彿

其萬分也哉伏惟陛下察臣之言以究四說之同異而明辨之則知臣之所言非臣所為之說乃古先聖賢之說非聖賢所為之說乃天經地義自然之理雖以堯舜禹湯文武周孔之聖顏曾伯軻之賢而有所不能違也則於臣之言與夫論者之說其為取舍從違不終日而決矣抑臣於此又切有感而自悲焉蓋臣之得事陛下於今二十有七年矣而於其間得見陛下數不過三自其始見於隆興之初固嘗輒以近習為言矣辛丑再見

又嘗論之今歲三見而其所言又不過此臣遐方下土
田野之人豈有積怨深怒於此曹而固欲攻之以快已
私也哉其所以至於屢進不合而不敢悔者區區之意
獨為國家之計而不敢自為身謀其愚亦可見矣然自
頃以來歲月逾邁如川之流一往而不復反不惟臣之
蒼頭白髮已迫遲莫而竊仰天顏亦覺非昔時矣臣之
鄙滯固不能別有忠言奇謀以裨聖聽而陛下日新之
盛德亦未能有以使臣釋然而忘其夙昔之憂也則臣

於此安得不深有感而重自悲乎身伏衡茅心馳魏闕
切不勝其愛君憂國之誠敢冒萬死剗瀝肺肝以效野
人食芹炙背之獻且以自乞其不肖之身焉

臣區區私計輒冒威

顏并此陳述臣賦性拙直不能隨世俯仰故自早年即
自揣度決是不堪從官所以一向竊食祠祿前後九任
豈不知有致身之義亦非恬無濟物之心寧為退藏蓋
以避禍中間稍蒙任使果然自速顛隳七年之間措身
無所今者一出又致紛紜幸賴聖明保全終始增其祿
秩使足以免於饑寒進其官資使足以延於嗣息此皆
已非臣平生意望所及天地之恩不啻厚矣今者奏疏
止為感激陛下虛心屈已容受狂言故竭平日憂國之
誠以畢前日願忠之意所冀上有補於聖明下無負於
所學而已非敢變其初心而復有進為之望也若蒙聖

慈詳賜觀覽循其本末次第施行使臣之言卓然實有可見之效則臣不待違心犯患以汙周行而其榮遇已不在諸臣之後矣如其謬妄無可施行則投閑置散乃分之宜雖欲借之恩私適足增其慚懼決非臣之所敢當也竊恐陛下見其所論懇切誤謂尚堪使令故復具奏伏乞聖察伏惟陛下哀憐財赦而擇其中則非獨愚臣之幸實宗社生靈之幸

臣之所論雖為

一時之弊然其規畫實皆治體之要可以傳之久遠而無窮蓋前聖後聖其時雖異而其為道未嘗不同此臣之言所以非徒有望於今日而又將有望於後來也踈遠賤微言不敢盡伏惟聖慈憐臣愚忠赦其萬死或因皇太子參決之際特臣熹誠惶誠恐昧死再拜謹言賜宣示千萬幸甚

古文集成卷五十八